



АСТАНА

АҚШАМЫ

КӨРНЕКТІ АҚЫННЫҢ АЙШЫҚТЫ КЕШІ

Астана қаласы әкімдігінің қолдауымен Конгресс-холда арқалы ақын, драматург, халықаралық «Алаш» әдеби сыйлығының иегері, ҚР еңбек сіңірген қайраткері Серік Тұрғынбекұлының «Тәуелсіздікке тағзым» атты шығармашылық кеші өтті. Ақынның 70 жылдығына арналған кеште өлеңдері оқылып, сөздеріне жазылған әндер шырқалды.



Ақ тілектер ақтарылды

Қазақстанның Халық жазушысы Сәкен сері Жүнісов қазақтың қара өлеңінің ақжал арыстанына теңеген ақынға Мемлекеттік хатшы Гүлшара Әбдіқалықова, Парламент Сенатының төрағасы Қасым-Жомарт Тоқаев, «Нұр Отан» партиясы Төрағасының бірінші орынбасары Мұхтар Құл-Мұхаммед, Жазушылар одағы басқармасының төрағасы Нұрлан Оразалин, Атырау облысының әкімі Нұрлан Ноғаев жолдаған құттықтау хаттары оқылды. Астана қаласының әкімі Әсет Исекешевтің ізгі лебізін қала басшысының орынбасары Ермек Аманшаев жеткізді.

– Құрметті Серік Тұрғынбекұлы! Сізді ғұмырыңыздың асқаралы белесі – 70 жылдық мерейтойыңызбен шын жүректен құттықтаймын! Сіз – қазақ поэзиясында өзіндік орны бар, айрықша қолтаңбасы қалыптасқан көрнекті ақынсыз. Қазақ әдебиетіне қосқан үлесіңіз оқырман қауым тарапынан жоғары бағаланып, көпшіліктің сүйікті ақынына айналдыңыз. «Мұқағали» драмасы мен «Кейкі батыр» дастаныңызды халық зор ықыласпен қабылдады. Осындай шығармаларыңыз өскелең ұрпаққа тағылымы мол мұра боп қалары сөзсіз. Жүрегіңіздің түбінен мөлдір сезім болып ақ қағаз бетіне түскен өлеңдеріңіз халықтың сүйікті әндеріне айналғаны да ақиқат. Қадірлі Серік Тұрғынбекұлы! Бұл айтулы күнде Сізге зор денсаулық, мол бақыт, шығармашылық табыс тілеймін, – деген жолдарды оқыған Ермек Әмірханұлы қала басшысының атынан ақынның иығына шапан жапты.

«Серік өлеңдері – арындап алып та қашпайтын, бір орында тапжылмай тұра да бермейтін, бойында қаны бар байыпты, байсалды жырлар. Ол бойындағы дарынын шашпай-төкпей, асықпай, аптықпай, жаймен, ақылмен жырлауға ұмтылады» деген екен кезінде Серік Тұрғынбекұлының шығармашылығы жөнінде ақиық ақын Мұқағали Мақатаев. Жастық шағында Мұқағалидың соңына еріп, оны ұстаз тұтқан ақынның қаламынан кейіннен «Мұқағали» драмасы туды. Бұл туынды Астанадағы Қ.Қуанышбаев атындағы мемлекеттік академиялық Қазақ музыкалық драма театрының репертуарынан түспей келе жатқанына да он бес жылдың жүзі болды. Кеште аталған драмадан үзінді көрсетілді.

Дастандары мен драмаларына тарихи тұлғалардың өмірін арқау ететін Серік Тұрғынбекұлы «Шәмшінің әні» аталатын пьесаны да жазып тастапты. Басты рөлге Жастар одағы сыйлығының иегері Нұрай Танабаев тандалған спектакльден де бір үзік көріністі тамашаладық. Бұйырса, келесі жылы бұл қойылым қалың көрерменге де жетеді. Ал бұл кештегі сахналық қойылымдарды Қалекки театрының әртістері әсерлі ойнап шықты.

Туған елдің медалін тақты

Биыл – Қостанай облысының 80 жылдығы.

Осыған орай облыс әкімінің тапсырмасымен «Тобыл-Торғай» күміс медалі жасалды.

Оның тұңғыш иегері Серік Тұрғынбекұлы атанды. Сондай-ақ, кеште ақынға өзінің туған жері – Жангелдин ауданының «Құрметті азаматы» атағы тапсырылды.

Композитор Қарасай Сайжанов Серік Тұрғынбекұлына «Серік сері» атты күй де арнаған екен. Бұл күйді Астана қаласы мемлекеттік академиялық филармониясының Қазақ оркестрі (дирижері ҚР Мәдениет қайраткері Нұрлан Бекенов) орындады.

Қазақстанның Еңбек Ері, Халық жазушысы Әбіш Кекілбайұлы ақынның «Кейкі батыр» дастаны жөнінде «Қазақ өлеңінің жалында құйындай ойнайтын шабандоз ақын Серік Тұрғынбекұлы бұл дастанында су шайқалмас жорғадай төгіліп-ақ бағыпты. Күллі ұлт болып өз тарихымызды саралап жатқан рухани ізденіске өрелі үлес қосқан талантты суреткерге риза болмасқа хақыңыз жоқ» деген пікірін айтқан. Бұл поэма туралы халқымыздың тағы бір дара тұлғасы Ақселеу Сейдімбек: «Дастан қазақ топырағында қалыптасып, қабырға қатайтқан оқиғалы поэмалардың үлгісінде жазылған. Жат жұрттың рухани үрдісіне еліктеу де, солықтау да жоқ. Сөйте отырып бес ғасырлық мектебі бар қазақ поэзиясының поэтикалық мол ғибратын ақын Серік қапысыз пайдаланып отырады» деген.

15 жасында әнге сөз жазды

Алдыңғы толқын ағалардан осындай көңілді өсіретін сөздерді естіген

ақынның қара өленде де, әдебиеттің поэма, драма жанрларында да жеткен табыстары жетерлік. Ал Серік Тұрғынбекұлының ән мәтіндері – бөлек дүние. 100-ден астам әнге сөз жазған ақын Әбілахат Еспаев, Әсет Бейсеуов, Ескендір Хасанғалиев, Сейдолла Бәйтерекөв, Кеңес Дүйсекеев, Алтынбек Қоразбаев, Қалибек Деріпсалдин, Марат Омаров сынды танымал композиторлармен шығармашылық одақ құрған. Кейбір әндер қазір белгілі болып жүрген бірқатар әншілердің өнерінің өрістеуіне де жол ашқан. Мәселен, Қанат пен Айткүл Құдайбергеновтер Серік ақын сөзін жазған Әсет Бейсеуовтің «Жолың болсын, жолаушы» әнімен көпшілікке танылды. Осы жұп ақынды мерейтойымен құттықтап, аталмыш әнге салды.



Сонау алпысыншы жылдардың басында Серік Тұрғынбекұлының дарынын талантты композитор Болат Хамзин байқайды. Сөйтіп отырып, он бес жасар ақынға «Торғай қызы» деген әнге сөз жазуға тапсырыс береді. Бала ақын оның бұл тілегін орындайды. Міне, содан бері бұл ән Торғай атырабында шырқалып келеді. Кеште бұл әнді әнші Отаркүл Мұқатова тамылжытты. Сондай-ақ, Сұлушаш Нұрмағамбетова, Сембек Жұмағалиев, Тамара Асар, Нұрғали Тұрлыбеков, Марат және Зарина Омаровтар, Гүлзира Бөкейханқызы, Жазгүл Даңылбаева ақын сөзіне жазылған әндерді салды. ҚР Халық әртісі Нұрғали Нүсіпжановтың Алматы қаласынан ат арытып жетуі көпшілікке үлкен сый болды. Филармонияның Қазақ оркестрінің сүйемелдеуімен Әсет Бейсеуовтің «Сағынып келдім, Торғайым» әнін шырқаған майталман әнші әлі де бабында екенін көрсетті. Сондай-ақ, Торғайдан шыққан талантты әнші Ғазиза Жүмекенова мен Зағипа Иманғазиева да жанды дауыста әндерді орындады. Серік Тұрғынбекұлын елі құрметтейді екен. Ақынның мерейін өсірген бұл кештің ұйымдастырылуы осыған көз жеткізді.

Аманғали ҚАЛЖАНОВ